

BUDUĆNOST PRIPADA ISLAMU

Neka je hvala Allahu, dž.š., Gospodaru svih svjetova. Neka su salavat i selam na Poslanika Muhammeda, s.a.v.s., njegovu časnu porodicu, ashabe i sve sljedbenike, kojima su Uzvišeni Allah i Njegov Poslanik draži od svega.

Braćo moja u Dini Islamu! Jedina priznata vjera kod Uzvišenog Allaha jeste Islam. Ko bude htio neku drugu vjeru mimo Islama neće mu biti primljena i on će na Sudnjem danu propasti. A propast će i na Dunjaluku, jer će Islam pobijediti bez obzira na snagu svojih neprijatelja i snagu ili slabost svojih sljedbenika. Bez obzira na napade na Islam i muslimane, koji su bili prisutni tokom cijele prošlosti, koji su žestoko aktivirani i ovih dana u mnogim državama svijeta i koji se planiraju i u budućnosti (a o čemu nam govore brojni hadisi), mi muslimani treba da budemo ponosni na svoju vjeru te da budemo jaki, odlučni i stabilni, jer budućnost pripada Islamu.

Zašto ovo govorim? Zato što sam primjetio da se mi muslimani nekako stidimo svoje vjere i da se sramimo javno pokazati da smo muslimani. Mislimo, ako se pred drugima prikrivamo ili im se dodvoravamo, da će nas oni maziti i pustiti da živimo u miru. Ne. Mi smo mnogima trn u oku. Pogotovo iz razloga što se zahvaljujući prvo Dragom Allahu a onda i ovim masovnim medijima, Islam širi nevjerovatnom brzinom. Što su napadi na Islam žešći, to je broj muslimana u svijetu veći. I ne samo da se muslimani dobro rađaju, već je i sve veći broj nemuslimana koji prihvataju Islam, a koji su vidjeli da ih mediji lažu i koji su sa osjećajem mržnje prema Islamu krenuli da ga izučavaju, što je na kraju rezultiralo njihovom promjenom i prihvatanjem Islama. Među njima su brojni političari koji su prethodno ljude huškali na muslimane, svećenici koji su do jučer ljude pozivali u druge vjere, naučnici koji su tražili greške u Kur'anu pa ih nisu pronašli, već su pronašli masu naučnih činjenica koje u vrijeme objave Kur'ana (pa čak ni doskora) ljudima nisu bile poznate.

Braćo moja! Sva snaga pripada Uzvišenom Allahu, a On snagu daje vjernicima. Kada su jednog alima pitali gdje je snaga koju Uzvišeni Allah spominje u ajetu: "**Snaga pripada Allahu, Njegovom Poslaniku i vjernicima.**" (El-Munafikun, 8.), on je odgovorio: "Nije u pitanju gdje je snaga, već gdje su vjernici." Snage ima, hvala Dragom Allahu, i ne treba da nas plaši to što neprijatelji Islama u medijima pokazuju nekakvu svoju snagu i nadmoć. Naše je da gradimo i jačamo svoj iman u srcu, a to nećemo moći postići sve dok nam islamski šarti ne postanu dio našeg svakodnevnog života, dok nam tuđe zlo ne prestane biti draže od našeg dobra i dok se ne prestanemo raspravljati oko toga ko je upravo i ko je od koga veći musliman – jer sve su to stvari koje razbijaju naše jedinstvo, a mi samo kao zajednica možemo biti jaki. Zato je Uzvišeni Allah rekao da snaga pripada vjernicima, a ne vjerniku. I zato je rekao: "**Svi se skupa Allahovog užeta držite i nemojte se dijeliti!**" (Ali Imran, 103.) Zajednicu grade pojedinci, ali pojedinci sebe grade kroz zajednicu.

Braćo moja, budimo sretni što smo rođeni kao muslimani, što smo odrasli u muslimanskim kućama i što smo odgojeni kao muslimani. To je samo blagodat od našeg Gospodara, koji u Kur'anu časnom kaže: **"On vas je odabrao i u vjeri vam ništa teškim nije učinio, u vjeri vašeg praoca Ibrahima. On vas je nazvao muslimanima, i prije a i u Kur'anu..."** (El-Hadždž, 78.) U tom smislu nas podsjećam na Njegovu naredbu: **"O vjernici, bojte se Allaha istinskom bogobožnošću i nemojte umirati drugačije nego kao muslimani!"** (Ali Imran, 102.) Neka naš život, naš ibadet (radi kojeg smo i stvoreni) i naša smrt budu samo u ime Uzvišenog Allaha. Nekad će nam ibadet izgledati teškim, nekad ćemo biti umorni i mrzovoljni pa nam neće biti ni do čega a nekamoli do ibadeta, nekad će nam neke stvari izgledati preče od namaza, ali neka nam je uvijek na umu da smo mi muslimani i da takvi treba da ostanemo do smrti. Čuvajmo svoj Islam, bez obzira što nam nekad izgleda kao da je žar na dlanu. Možda će nas nekad malo i pržiti, ali će nam put pokazati i bit će nam svjetlo u mraku. I čuvajmo svoju dovu!

To će nam posebno biti važno u tamnim vremenima koja dolaze. Vi i sami vrlo jasno vidite šta se dešava i šta se još sprema u svijetu. Mi moramo biti spremni. Ništa, pa čak ni Blackout koga već godinama najavljuju, ne smije nas iznenaditi niti baciti u očaj. Pratimo situaciju u svijetu, čitajmo hadise o predznacima Smaka svijeta, pripremajmo se za sutra, čuvajmo svoju vjeru, svoju porodicu i svoje zalihe, i svi se skupa Allahovog užeta držimo. Neka nam je Dragi Allah na pomoći!

Gospodaru naš, ujedini naša srca, popravi naše međusobne odnose, uputi nas putevima mira, izvedi nas iz tame na svjetlo, sačuvaj nas tajnog i javnog razvrata, podari nam bereket u sluhu, vidu, srcu, bračnim drugovima i djeci, oprostí nam grijehe i učini nas zahvalnim na blagodatima. Amin.